


**DISSERTATIO
INAUGURALIS
JURIDICA PUBLICO-
CIVILIS, DE JURE
AGGRATIANDI;...**





*ILLVSTRISSIMO ET EXCEL-
LENTISSIMO*

**DOMINO
DN. FERDINANDO,
S. R. I. COMITI**

**DE
PLETTENBERG, WITTVM,
EYS ET VIANEN;**

**DOMINO IN NORDTKIRCHEN, MEINHÖVEL,
DAVENSBERG, LEMBECK & NALRATH;
SACRÆ CÆSAR. REGIÆQVE CA-
THOLICÆ MAJESTATIS,**

NEC NON

**SERENISSIMORVM PRINCIPVM ET ELECTO-
RVM COLONIENSIS ET BAVARI CONSILIARIO INTI-
MO ET CAMERARIO, DIOECESIS MONASTERIENSIS
MARECHALLO HÆREDITARIO; SERENISSIMI ELECTO-
RIS COLONIENSIS EPISCOPI ET PRINCIPIS PADER-
BORNENSIS, MONASTERIENSIS, HILDESIENSIS ET
OSNABRVGENSIS MINISTRO PRIMARIO ET
SVPREMO CAMERARIO,**

**DOMINO MOECENATI SVO
GRATIOSISSIMO.**

ILLVSTRISIME ET EXCEL-
LENTISIME

. ROM. IMPERII COMES,
DOMINE, DOMINE,
ET PATRONE GRATIOSISIME.



*Isi non leviter in humanitatis
Leges deliquisse mihi videar,
ILLVSTRISIME AC EXCEL-
LENTISIME DOMINE DO-
, &c. &c. si innumeras TVAS pro Rei-
æ salute curas vel momentum interpel-
& vilissimæ huic Dissertationi meæ IL-
LUSSTRISIMVM NOMINIS TVI splendorem ap-
te temerarius attentarem; nihilominus
sublimissima TVA, qua etiam minima
quæ-*

quæquè respicis, Clementia, & clementissima
Sublimitas tantum mihi fiduciæ addidit, ut
quò mea me abstertere debebat tenuitas, præ-
sumere non erubescerem. Ostendisti siqui-
dem dudum Imperio Romano, quid possint la-
bores TVI propemodum immensi, in diversis
legationibus pro salute publica exantlati, &
Europa admiratur universa. Devinxisti
omnium TIBI animos stupendâ TVA in Poli-
ticiis prudentiâ, dum consilia TVA profundis-
sima, & felicissimam in rebus singulis agendi
dexteritatem eò semper direxisti, ut præteri-
ta nunquam præterires, Præsentia profundè
discuteret, futura sapientissimè prævideret, &
penè jam ageret à multa primum posteritate
agenda. Tanto tamen laborum cumulo di-
stentus nunquam (quod Excelsarum mentium
indoles est) devotos minimorum etiam subdito-
rum animos despiciebas. Patere igitur ILLV-
STRISIME AC EXCELLENTISIME DOMINE DO-
MINE &c, &c. ut meam hanc de Fure Aggra-

*Dissertationem, in qua præter NOMEN
magnum nihil est, tanquam devotissi-
bmissi animi tesseram gratissimis TVIS
us consecrem. Et si forsan in hoc te-
tis delictum commisero, primum Furis
tiandi specimen ab innata TVA Clemen-
am olim Musæ nostræ Hieranæ abun-
rtæ sunt, demississimè efflagito, cui,
ivam, devotissimo tibi inserviendi stu-
humillimè commendans perenno.*

ILLVSTRISSIMÆ AC
GRATIOSISSIMÆ
EXCELLENTIÆ TVÆ

Devotissimus & humillimus servus

ANTONIUS JOSEPHVS LARENZ.



Q. D. B. V.

DE JURE AGGRATIANDI.
PROÆMIVM.



Inter varia virtutum ornamen-
ta, quæ sublimæ Principis fa-
stigium illustrent, Clemen-
tia præminet, quæ, uti ada-
mas in auro, vel sol in cœlo,
sic in Principe radiat, ac prima ipsius dos est,
imò pretiosissimum Regiæ Majestatis, & Prin-
cipalis Serenitatis monile dicitur à CHASSAN. *de*
Glor. Mund. REINKING. *de R. S. & E. lib. 2. cl.*
1. c. 3. per quam solam Dei imitationem serva-
ri, asserit Justinian. *in L. ult. C. de Donat. int.*
vir. & ux. Nec enim per aliud Princeps Deo
pro-

propius accedere potest, quam si hominibus, dando si eguerint, indulgendo si supplicaverint, parcendo si deliquerint, salutem conferat; Hæc illa immortalis Imperantium Gloria, quæ tantopere decet Principes, ut Titulum inde adepti appellentur Clementissimi, juxta *cit.* REINKING. quamque exercendo Regnantes subditorum sibi conciliant benevolentiam, quæ sanè præsidium Principis firmissimum, cum munitissimas habere dicatur Civitates Princeps, quem subditi fide & amore complectuntur. Est autem Clementiæ proprium, pro personarum, locorum ac temporum circumstantiis, juris stricti rigorem mitigare, & ad misericordiam potius, quam ad severitatem deflectere; quò collimare videtur Recess. Imper. de ao. 1526. §. Es soll auch eine jede Obrigkeit zc. nach Gelegenheit eines jeden Verhandlung sich dermaßen erzeigen/ damit die Unterthanen/ so viel sich thun leyden will/ mehr Gnade und Güte/ dann Schärffe und Ungnade spüren und finden mögen. Melius enim est, Deo Misericordiæ rationem reddere, quam inclementiæ. *Can. allegant. C. XXVI. Q. 7.* perquam piè & appositè

tè etiam loquitur JUSTINIAN. in L. 23. C. de
Nupt. dum inquit: *ita credimus Dei benevo-*
lentiam, & circa genus humanum nimiam Cle-
mentiam (quantum nostræ naturæ possibile est)
imitari, qui quotidianis hominum peccatis sem-
per ignoscere dignatur, & poenitentiam suscipere
nostram, & ad meliorem eam statum deducere;
quod si circa nostros subjectos imperio nos etiam
facere differamus, nulla venia digni esse vide-
bimur. Potest verò Princeps ex sua Auctorita-
te non solum poenas in Lege propositas tempe-
rare, sed & planè remittere. L. 9. §. 11. ff. de poen.
Quæ Auctoritas Jus aggratiandi compellari
consuevit: Cujus dum Naturam contemplari
& pro specimine Inaugurali proponere susci-
pio, neutiquam mihi animus est latissimam
hanc Principalis Clementiæ amplitudinem li-
mitibus circumscribendi, sed tantum ea, quæ
vel hac in parte sunt certa prudentum dogma-
ta, è genuinis Jurisprudentiæ universalis, nec
non Germanicæ fontibus delibandi, vel etiam
inter Interpretes disceptata, in medium produ-
cendi. Equidem non inficior, huncce qualem
qualem ingenii conatum vix ullius respondere
m. i. c. l. B expe-

expectationi, nec dignum esse, ut doctissima
& dextrè polita ora subeat; interim tamen te-
stari poterit, quod non arrogans laudis cupido,
sed Promotorum jussus elaborationem publi-
ci hujus speciminis mihi præceperit.

CAPVT I.

*De Etymologia, synonymia, & Definitione
Juris Aggratiandi.*

§. I.

Vocabulum *Juris* variis significationibus circum-
fluere, ipsis etiam Dupondijs adeo notorium
est, ut nulla demonstratione indigeat; *Cons.*
L. pen. & fin. ff. de justit. & jur. mihi prætermis-
sis significationibus aliis quas alii passim agglomerant, hoc loco
facultatem, ac potestatem jure competentem denotat;
in quo significatu quoque sumitur *inst. & ff. De*
his qui sui vel alien. jur. ut & in tit. D. & C. de Jure de liber.
Nec non, quando Majestatis propria, seu Regalia jura
dicuntur, ac per hoc vocabulum definiuntur.

§. II.

Vocabulum autem *aggratiandi*, quod è proverbio
Ad, & nomine *Gratia*, deductum videetur, nihileminus
vulgo barbarum dicitur, & potioris latinitatis amatoribus
minus usitatum, veterisque ævi Ignoratum fuit,
adeo, ut ortu licet latinum, non tamen usu tale, hoc
verbum fuisse, merito dixeris. Jam autem usus, &
forum

forum nostrum hoc verbum diu recepit; & passim à longo jam tempore JCtis non contemnendæ auctoritatis existit familiare; quorum nomina, si quis numerare vellet, non multò breviorẽ texeret Catalogum, quàm est Homericus Græcarum navium; enim verò præter innumeros hoc verbum, *Aggraianti*, usurpant VITRIAR. in *Instit. Jur. Public. Lib. 3. t. 16. n. 112.* SCHWEDER. in *Introd. ad Jus Publ. Part. Spec. Sect. 2. c. 14. n. 4.* COCCEJ. *Jur. publ. prud. Cap. 23. §. 8.* CARPZOV. de *L. Regia. c. 9. Sect. 11. n. 23.* PETR. THEODOR. in *Colleg. Crim. Disp. 10. th. 7. lit. b.* STRUV. *S. I. C. Exerc. 49. th. 89.* Nimirum JCti Practici non habent stomachum adedò delicatum, uti Tiberius, de quo ex SVETONIO refert C. JAC. in *Paratit. C. de Monopol.* quod græcis quoque vocabulis, quasi barbaris abstinerit, adedò, ut Monopolium nominaturus, prius veniam postulaverit: quod sibi verbo peregrino utendum esset. Nec nimia religione se verbis adstringunt, illorum instar, quos Ciceronianos vocamus, qui cum nihil, nisi in Tullio sibi lectum, usurpare volunt, sæpè coguntur reticere, quæ optimè animo conceperunt, vel saltem ridiculè admodum circumscribunt, quæ unico, veteribus quidem ignoto, atamen necessario vocabulo poterant effari. VOSS. de *Vitiis Serm. L. 1. C. 7.* Inde apud magni nominis JCtos variæ tam ab Italis, quam Gallis & Germanis, mutuatæ voces passim leguntur; veluti jus obstagii, quæ vox detorta ab Italica *Obstaggio* & *staggio*, quæ obsidem notat, quem Galli *Ostage* aut *hostage* dicunt. Jus Appanagii; quod à Gallico vocabulo *appenage*, provinciam quandam secundo aut tertio genito, à Principe delegatam

tam denotat. Charta Blanca, à Gallico adjectivo blanc, vel Italico Bianco. Diffidatio, à verbo Gallico *diffier*. CARPZOV. *Ptax. Crim. p. 1. quæst. 37. n. 15.* WEHN. *Obs. pract. voc. Befeden.* Instrumentum Guarentigiarum, à Guardia, quod Thuscis & Longobardis custodiam, & securitatem significat. COLER. *de Proc. Execut. P. 1. c. 3. n. 19.*

§. III.

Jus Aggratiandi, sive *Aggratiatio* Germanico idiomate sonat, die Begnadigung/ Nachlassung/ Erlassung/ Eindrung der Straffe/ hinc vulgo dicitur: Gnade für Recht gehen lassen. Synonima illius varia occurrunt: vocatur enim quandoque indulgentia. *L. 7. 10. §. 12. c. de sentent. pass. §. restit.* Remissio poenæ, impunitas facinoris. *L. 5. pr. ff. de poenis.* Dispensatio, seu mitigatio juris; Relaxatio. *Nov. 141. in fin.* Benevolentia, moderatio, Clementia; *L. 23. C. de Nupt.* Beneficium. *L. 3. ff. de constitut. Princip.* Venia; Augustæ liberalitatis Humanitas; Principalis Serenitatis indultum. *L. 3. C. de Episcop. audient.* Imperatoria Lenitas. *L. 5. §. 1. C. ad L. Jul. Maj. Criminum* seu poenarum abolitio, non quidem in sensu Juris Romani, sed in eo, quem juxta Germaniæ mores sequitur STRYK. in *Dissert. de Abolitione Princip.* quam & hæc ab aggratiatione, strictè dicta, in eo differat, quod aggratiatio concedatur post condemnationem, abolitio verò antè, nempe criminali processu adhuc pendente, & necdum sententia definitiva absoluto; inde etiam in abolitione salva manet fama, quæ in aggratiatione præsupponitur amissa, nec semper restituitur. *L. 7. C. de sent. pass. §. restit.* BÖMMER. *ad ff. tit. adsc. Turpill.*

pill. §. 6. seqq. Nuncupari etiam solet Restitutio *tot. tit. ff. & C. de sent. pass. & restitut.* quæ tamen propriè est gratia Principis, qua hi, qui sententiam passi sunt, & revera poenam promeritam adhuc sustinent, in priorem statum restituuntur. *L. 13. in fin. C. dist. tit.* Itaque locum habet in poenis executioni datis, tractum tamen temporis successivum habentibus; ut exilii, carceris perpetui, vel ubi aliàs res potest redintegrari, ut in confiscatione bonorum; Aggratiatio è contra latius patet, & non tantum poenam jam jam inflictam abolendam respicit, verùm etiam ejusdem impositionem antecedit; Illud interim ex natura rei patet, in poenis, omnem restitutionem excludentibus, ut mortis, aggratiationem poenæ impositione seu executione semper debere esse priorem. Conf. BÖHMER. ad *ff. tit. de sent. pass. & restitut. §. 1. & 2.*

§. IV.

Quapropter *Jus Aggratiandi* hoc modo rectè definiti potest, quod sit publica & Legitima potestas, reis, sive delinquentibus, convictis aut confessis ex singulari clementia promeritas Criminales poenas cum judicio & discrezione vel ex toto vel ex parte remittendi. Quò autem prolata Definitio eò Clarior evadat, dixi, quod *jus aggratiandi* sit potestas promeritas poenas remittendi; ante omnia enim requiritur, ut poenæ tales justè infligi potuerint; siquidem *venia*, ut SENECA, in *fin. libror. de Clement.* inquit, *debitæ poenæ est remissio.* Quando igitur infantes, Furiosi, Noctambuli, homicidium aut aliud crimen committentes, nec non Homicidæ casuales, & similes nullâ afficiuntur poena juxta *L. 12. ff. ad L. Cornel. de Sicar. L. 14. ff.*

de offic. Præsid. L. 5. §. 2. ff. ad L. Aquil. L. 9. §. fin. ff. de L. Pomp. de Parricid. L. f. in f. ff. de Administr. tut. L. 3. §. 1. ff. de injur. Clem. un. de Homicid. CARPZOV. prax. Crim. p. 3. q. 143. n. 9. seqq. & quest. 145. n. 9. seqq. FARINAC. Prax. Crim. p. 3. quest. 92. n. 46. seqq. vel quando ex imbecillitate, absque proæresi. Delinquentibus: ut ebrietate immodica obrutis, de quibus CARPZOV. diff. Q. 145. & FARINAC. diff. l. Q. 93. MAGER. de Advocat. armat. e. 17. n. 494. seqq. de crepita ætate defectis: TIRAQVEL. de pœn. temperand. caus. 8. Animi perturbatione laborantibus, nec non iustâ Irâ concitatis, CARPZOV. diff. q. 145. & quest. 147. Aut ob alias causas ipsum delictum minuentes, de quibus principaliter agunt TIRAQVEL. & FARINAC. in Dd. Trr. de pœn. remittendis & temperand. SCHRÖTER in Diss. de Patrocinio Homicidar. GLÆSER. de Grat. delinquent. fac. membr. 5. art. 86. GRANZ. Defens. Inquis. C. 6. membr. 2. & c. 8. m. 21. Pœna mitigatur, seu ordinaria minor ac levior imponitur, illud potius per justitiæ viam, quam vi hujus juris aggratiandi fieri non dubito; Enimverò Magistratus prædictis in casibus, non tanquam graciosus dispensator aliquid remittit, aut lege sese præbet clementiorem, utpote quod aliàs jure sat aperto prohibitum. L. 14. C. de pœn. Nov. 82. C. 10. Sed tanquam legum executor, ut Lex præcipit, punit. Nam nulla lex ita in genere & in abstracto loquitur, ut non id, quod ultro factum, distinguat ab eo, quod invito: & quod ex proæresi, ab illo, quod ex imbecillitate quadam, nimirum hæc sunt, quæ tum genus, tum speciem delicti constituunt. Sanè aliud esse, quod impetu, aut casu delinquitur: aliud, quod

quod consulto, sive ex proposito, disertis docet
 verbis MARTIAN. in L. 11. §. 3. ff. de Pœn. adstipu-
 latur VLP. IAN. in L. 5. §. fin. ff. eod. Et CICERO
 I. offic. de injuria. Inquit; per multam interest, utrum per-
 turbatione aliquâ animi, quæ plerumquæ brevis est, & ad
 tempus: an consulto & cogitato quid fiat; leviora enim sunt;
 quæ repentino aliquo motu accidunt, quàm ea, quæ meditata
 & preparata inferuntur. Et ideo majora supplicia illis
 decet imponere; qui consulto, per iram inter fecerunt; illis
 contra, qui repente & inconsulto, leviora. PLATO 9. de LL.
 Neque enim ait D. AMBROS. in Can. illa Cavenda. 6. Cau-
 sa 15. q. 1. si per furorem aliquis innocentem peremerit, ob-
 noxijs morti est; quàm etiam divina Legis oraculo, si quis
 per imprudentiam intulerit necem, accipit impunitatis spem,
 refugiique facultatem; ut possit evadere. Deuter. 4. vers. 41.
 & 19. v. 5. sqq. Nempe mala non sunt, nisi quæ cri-
 mine mentem implicant; & conscientiam ligant.
 Dist. Canon. illa Cavenda. Mens autem alienata furore,
 cum sui compos non sit, eorum, quæ admittit, reatum
 non contrahit, quia facultatem deliberandi non habu-
 it. Hæc itaque & similia, accuratè examinare, non est
 pœnam legibus præfinitam mitigare, sed delicta inter
 se distinguere ac æstimare, ut quid deliquerit reus, &
 cujus legis pœnæ obnoxium sese fecerit, sciatur, ne
 quid durius, aut remissius constitutur, quàm causa
 deposcit, monente MARTIANO in L. 11. pr. ff. de pœn.
 Ex hoc igitur cognoscere licet, quàm malè plerū-
 que justitiæ & clementiæ viam confundant; Nimirum
 non distinguentes inter Epikiam, quæ legem rationis
 biliter

biliter interpretatur, & relaxationem sive dispensationem: Hæc enim legem probabili ex causa tollit, vel ejus vim suspendit; illa verò declarat factum ab initio; mente legis non fuisse comprehensum. GROTIUS *de jure B. & P. lib. 2. C. 20.* Hæc ad Regalia seu Majestatis jura refertur, ac è Throno clementiæ descendit: Illa è contra justitiæ pars est, & ad jurisdictionis executionem pertinet, ac consequenter inferioribus quoque Magistratibus merum saltem imperium habentibus, est permessa, imò potius præcepta. MEVIUS *ad jus Lubec. lib. 4. tit. 15. art. 1. n. 20.* Cæterum, cum jus Aggratiandi, facultatem *promeritis poenas remittendi* dixerim, etiam hoc exinde intelligi velim, id ipsum non ad futura, sed præterita tantum pertinere delicta; futurorum namque remissionem, utpote quæ ad delinquendum invitât, neutiquam valere, communis est DD. sententia; arg. *L. 27. §. 3. ff. de pact. L. 17. pr. ff. Commod. L. 5. §. 1. ff. de pact. dotal.* HVNN. *Colleg. Crim. Disp. 15. lb. 24.* PETR. THEODOR. *Colleg. Crim. Disp. 10. lb. 7. lit. 6.*

§. VI.

Porro in definitione superius allatâ dixi: *Criminales poenas*. quod non in eo sensu capi velim, quo juxta LAVTERRACH. *Colleg. Theor. pract. tit. de poen. §. 7.* Secundum quorundam locorum mores, per criminales poenas intelligi solent, quæ corporis afflictivæ sunt, *peinliche Straffen/ die an Haut und Haar gehen.* CARPZOV. *pr. Crim. quest. 102.* sed potius, quo in jure nostro civili omnes poenæ, tam corporales, quæ delinquentis corpori indiguntur, quàm pecuniariæ, quæ fisco sol-

vun-

vuntur, criminalium nomine veniunt. *L. 2. ff. de publ. jud. HVNN. dict. loc. Disp. 6. th. 5.* Voluit equidem hoc aggratiandi Jus DAMHOVD. in *prax. Crim. C. 149. n. 5.* ad capitales & corporales poenas restringere, cæterasque ab eo excludere; sed uti hoc simpliciter asserit, ita nullam dicti rationem adjicit; hinc, quin ad has quoque pertineat, nullatenus dubito. Civile itaque tantum interesse, quod privatorum respicit commodum, & agentibus adjudicatur, hic excluditur; hoc enim, cum nemini jus suum auferendum *L. 2. ff. de his, qui sui vel alieni jur. §. 2. Inst. eod.* Princeps remittere nequit; Et laudabiliter Principem facere, qui nec criminales poenas remittit, antequam parti læsæ satisfactio competens præstita sit, scribit HEIGIVS *p. 2. q. 24. n. 18.* & regulariter partis offensæ remissionem præcedere debere, docet CARPZOV. *de L. Regia C. 9. Sect. II. n. 6.* Hinc etiam est, quod summus in Imperio nostro Princeps invito offenso, haud possit bannitum absolvere. Land. Fried zu Worms *de anno 1495. tit. Welche um Friedbruchs willen in die Acht kommen. ibi:* Und welcher, oder welche, also durch Verwirckung in die Acht kommen, die sollen auch von uns darum nicht *absolviret* werden, dann mit Willen des Beschädigten, der oder die, brächten sich dahin mit Recht daraus. Atque hinc etiam laudat Duces Saxonix, Augustum ac ejus filium Christianum DAN. MÖLLER. *lib. 3. semestr. C. 31.* Quod in remissione criminis noluerint ullum læso asserre præjudicium, sed expresse remissioni adjecerint, suum jus quidem se homicidæ remittere, viduæ autem interempti se remittere nec posse, nec velle. Et licet Princeps Generaliter ac inde-

C

fini-

finire delicti veniam concedat; illa tamen ad præjudicium tertii, siue offensi regulariter trahi nequit, *arg. L. 2. §. 10. & 16. ff. ne quid in loco publ. HÆIG. d. q. 24. n. 20.*

§. VII.

Ulterius & illud observandum est, vocabulo hoc, *Criminales*, gratiosam hanc remissionem distingui à Civilium poenarum remissione, quæ privatorum pactis fieri solet, & potest. Privatos enim privatorum delictorum poenas, illorum commodum concernentes, non solum pactis, *L. 17. §. 1. ff. de pact.* Verum & transactionibus remittere posse, satis Evincit Textus in *L. 54. §. fin. L. 56. §. 4. ff. de furt. L. 13. C. eod.* adhuc scilicet; ut reus poenâ Civili liberetur non verò, ut ejus fama integra conservetur; Delictum enim confiteri, & luâ ipsius sententia judicari, ac damnari intelligitur. *L. 4. §. fin. L. 5. L. 7. §. 3. ff. de his qui not. infam.* Accedit, quod Magistratus, privata hac transactione non obstante, in delictis præsertim gravioribus, adversus reum inquisitorie possit procedere. *CARPZOV. pr. Crim. p. 3. q. 148. n. 4.* Transactio enim privatum tantum concernit interesse; hoc verò publicæ vigor disciplinæ exigit. *L. 9. §. 5. ff. de Publ. & vectigal.*

§. VIII.

Præterea in propositâ definitione dixi: *Cum judicio & discretione.* Siquidem sine judicio in poenis dispensans Princeps, non clementiæ virtutem exerceret, sed in lenitudinis vitium potius incideret. *1. 1. p. 2. Politic. Cap. 13.* Nimirum, ut in aliis rebus excessus plerumque in lubrico; moderatio in turo, atque laude posita est; Ita quoque Principi mediâ via hic intendendum; quæ

quæ aliàs quoque ut plurimum judicatur totissima. Eleganter & accommodatè *SENECA* de *Clem.* l. 1. c. 2. n. 4. *Non vulgò, inquit, ignoscere decet, sed adhibenda moderatio est, quæ sanabilia ingenia distinguere à deploratis sciat. Nec promiscuam habere ac vulgarem Clementiam oportet, nec abscissam; Nam tam omnibus ignoscere, crudelitas est, quàm nulli veniam dare. Itaque prudenter temperanda est in Principe mansuetudo & Clementia, ne nimia indulgentia sceleratis audaciam, augeat, & bonis noceat, dum malis parcit, hocque modo juris Dispensatio fiat Dissipatio, aut ex gratia evadat injuria, & beneficiendo labefactetur justitia. Laudabilem hanc moderationem observavit laudatissimus Princeps Trajanus, cui mitis severitas & minimè Dissoluta clementia tribuitur à *PLINIO* in *Panegy.* *LAVTERB.* de lib. ad lib. 48. ff. ib. 86. Cæterum quid Principi, aliisque hoc aggratiandi jure gaudentibus, inprimis hic veniat considerandum, ex infra dicendis apparebit.*

§. IX.

Denique in Definitione adjeci: *vel ex toto vel ex parte.* Ut indicarem, æque aggratiationis speciem esse, si pœna ex parte remittatur, veluti gravior in leviolem commutetur, quàm si tota relaxetur; Equidem *LAVTERB.* *Colleg. Theor. pract. ad tit. ff. de pœn.* §. 31. ab aggratiatione differre statuit Mitigationem, qua non tota pœna, sed ex parte tantum remittitur, sicquè temperatur. Verum, si Mitigatio talis non ex causis justitiæ, legibus comprehensis, sed ex mera Principis Clementia procedat, differentiam propriè dictam inter hæc duo non agnosco. Plus enim & minus non mutant rerum genera, ut docent Logicorum scholæ.

CAPVT II.

*De subjecto, sive cui Jus Aggratiandi
competat.*

§. I.

CUm in superiori Capite expositum sit, quale sit Jus Aggratiandi quod breviter declarandum sumpsit; proxima nunc meritò subjicitur tractatio: quanam illam potestatem habeant, & jure exercere possint. Si enim quæramus an venia concessa valeat, aut concedenda valere possit; primo omnium animadvertere debemus; an concedens hoc veniam indulgendi jure gaudeat? Namque Gratia, seu delictorum venia, ab eo, cui hæc potestas non competit, concessa, ipso jure nulla est; adeo, ut illa non obstante, reus iterum accusari, aut contra illum in processu inquisitorio procedi queat. FARIN. *Prax. Crim. lib. 1. conf. 53. n. 38.* Hinc reum quendam, à vasallo inferiore per gratiam relaxatum, nihilominus in ducatu Mediolanensi, cum gratiæ, diplomate collo annexo, suspensum fuisse, refert FARIN. *d. l. 1. Conf. 3. n. 1. seqq.*

§. II.

Competit autem hoc jus *Aggratiandi* quibusdam jure proprio, & independenter: Aliis beneficio alterius. Proprio Jure competit omnibus illis, qui in quacunque republica summam tenent potestatem, sive Majestatem, quales sunt, qui nullum inter homines superiorem recognoscunt, & jura Majestatis suo jure exercent. LANSIUS *de L. Regia 1b. 47.* nam sicut primum id est, quo nihil datur prius; & proximum, quod nihil antece-

tecedit: ità illud demum rectè summum dicetur, quò nihil superius est; Hinc summæ Potestatis, sive Majestatis hæc est natura, ut superiorem, sine implicatione contradictionis, nullo modo possit agnoscere. LAMPAD. *de Republ. Rom. Germ. C. 3. n. 20.* Hisce Regalibus seu Majestatis juribus, hæc poenarum veniam reis indulgendi potestas rectè annumeratur. LANS. *d. l. th. 103.* BESOLD. *Class. 1. Disp. polit. 3. th. 14.* FRAN. SCHMIER. *Jurispr. publ. univ. lib. 3. cap. 2. Sect. 3.* Nam quemadmodum Leges condere solo dignum est Imperio; *L. f. §. 1. C. de LL.* ita legibus, delicta certa poenarum genere coercentibus, derogare, æquè ad Imperii & Majestatis jura rectè refertur; ex uno namque & eodem fundamento, & leges ferendi potestas, & de illis dispensandi promanat facultas. MOLIN. *de Just. & Jur. rom. 6. C. 57.* Hinc nihil verius esse, quàm poenarum remissionem soli Principi supremo, jure proprio competere, scribit HEIG. *p. 2. q. 22. n. 6.* Nimirum cum beneficia sint gratiosissima, poenæ è contra odiosissimæ, quo Princeps omnem à se acerbitalis ac truculentia amoveat susceptionem: benignitatis & clementia cum amore subditorum consequatur laudem omnia ipsum beneficia tribuere ac concedere convenit. FORST N. *in not. ad lib. 2. annal. Tacit.* Atque in tantum hanc poenarum gratiam, ad summum spectare Principem, agnovit CAROLVS V. Imperator, ut, licet Senatui Mediolanensi potestatem fere Regiam concederet, delictorum tamen veniam largiri reis peculiariter exciperet, suæquæ Majestati reservaret. BODIN. *de Republ. lib. 1. C. 8. & 10.* BESOLD. *d. l. C. 4. th. 4.* quò & Tiberius respexisse videtur, qui referente CARPZOY. *pr. Crim.*

Crim. p. 3. q. 150. n. 18. Asyla sustulit, ut gratia servatorum solis referretur accepta Principibus. Et apud venetos nulli Magistratui, ac ne Duci quidem, jus esse restituendi damnatos, sed toti Senatui, quem appellant *Consilio majori* hoc relictum esse, refert HVNN. in *Colleg. Crim. Disp. 10. th. 20.*

§. III.

Cum de Majestate in præcedenti pauca attulerim, illud præterire non possum, nonnullos esse politicorum, qui soli Imperatori & Regibus Majestatem adscribendam esse censent, uti videre est apud CHRISTOPH. MATTH. L. 3. *syll. pol. Exerc. 2. Sect. 6.* aliis è contra soli Imperatori Regibus exclusis, eandem propriè & strictè sic dictam attribuentibus. REINKING. de R. S. & E. lib. 1. *Class. 3. C. 17. n. 9.* utraqùe tamen sententia neutiquam subsistit; sed in omni perfecta Republ. dari Majestatem, ac proinde omnes quoque civitates, superiorem non recognoscentes Majestate propriè sic dicta instructas esse, cum saniori politicorum schola adserere non dubito; Et hoc etiam si minima fuerit civitas cum LANSIO de L. Regia th. 49. Verum esse judico; Nec enim locorum amplitudo aut provinciarum numerus ad summæ potestatis, seu Majestatis essentiam quidquam facit; Nequè ex eo, quod quædam Respublicæ Majestatis titulum sibi non vindicent; aut quod in Recessibus Imperii non Majestatis, sed Regiæ saltem Dignitatis titulus, Regibus attribuat, veluti in Recess. de anno 1527. §. und als die Wohlgebohrne II. item die Königl. Würde von England & §. und als auf gehaltenen Tag die Königl. Würde in Hispanien. 17. &c. certi quid concludi potest; vis enim Ma-

Majestatis non in nudo titulo ac nomine, sed in ipsa posita est potestate, nequē extranei Principes ex eo, quod in Germaniæ ordinationibus conscriptum, jura potestatis suæ mensurari patientur; WVRMSER. *Exercit. jur. publ.* 3. q. 2.

§. IV.

Ut à genere ad speciem decendam, primo in Imperio nostro loco jure merito recenseri debet Augustissimus Imperator; & veteribus quidem Romanorum Imp. jus Aggratiandi, proprium fuisse certissimum est. Cui enim tot exempla, tot testimonia, in jure nostro exstantia, non sufficerent? Conf. *L. 4. in ff. de pen. L. 10. C. de Sent. pass. L. 45. §. 1. ff. de Re judic. L. 7. C. de precib. Imp. offer.* Cum verò modernus Reipublicæ Germaniæ status ab illo antiquo Romano multum differat, & Ordines Imperii nostri quo ad Exercitium præcipuorum Majestatis jurium sint in Consortium vocati; uti hoc ex fundamentalibus Imperii nostri Legibus, ac imprimis Imp. Capitulationibus constat; Hinc in Disquisitionem vocari solet: *An hodierni Imp. Jure Aggratiandi gaudeant, illudque absque statum; aut Electorum consensu exercere possint?* obstat equidem videtur, quod secundum ea, quæ supra §. II. dicta sunt, potestas contra Leges dispensandi ejus demum esse dicatur, qui sancienti, & promulgandi eas facultatem habet. At verò in hodierno Imperii statu, Potestas Imperio, ejusque subditis, Leges præscribendi, Imperatori non nisi cum consensu Ordinum competit. *Instrum. pac. Osnabrug. art. 8. §. gaudeant.* Ut exinde & statum quoque consensus, in concedenda hæc Gra-

Gratia, necessarius esse videatur. Verum hisce nihil remorantibus, adhuc hodie Imperatoriæ Majestati hoc Aggratiandi jus omnino proprium esse, nec ad ejus exercitium consensum Ordinum desiderari, longe verius esse judico. Siquidem nullibi hæc Imperatoris potestas restricta legitur, cum tamen cætera Majestatis jura, ad quorum exercitium Imperii Ordines admissi sunt; Aut in Aurea Bulla, aut Capitulationibus Cæsarium, aut aliis Imperii Legibus expressa, atque definita reperiantur. Accedit, quod Imperatores per longum usum hoc jus exercuerint; & quamvis absque statuum consensu Leges universales condere nequeant; quin tamen jus singulare seu privilegia, nisi jus & utilitatem Reipublicæ concernant aut lædant, absque statuum consensu quotidie concedant, & hætenus concesserint, infinita exempla, nec non varia Dd. Testimonia manifestè confirmant. HERMES in *fascicul. jur. Publ. C. II. n. 76.* BOECLER. *Notit. Imp. L. 4. c. 1.* SCHWEDER. *Jur. publ. part. spec. sect. 1. C. 10. §. 4.* VITRIAB. *lib. 3. tit. 2. §. 12. & 17.* Et hoc sine dubio illis in casibus procedit, ubi super Crimine quodam soli Imperatori cognitio, ac puniendi Potestas competit; BERGER. *Oeconom. jur. Lib. I. tit. 2. §. 14. Nota 4.* LANGVY. in *Animadvers. in Coccej. prudent. jur. publ. ad Cap. 23. §. 8. n. 3.* Cum verò Imperator contra aliquem præsertim ex Imperii statibus, propter delictum jus decernendi Banni non habeat, sine collegiali Electorum consensu, juxta *Capitulat. Leopoldi art. 28.* Imo secundum *novissimam Capitulat. Caroli VI. art. 29.* non nisi communi statu

tuum consensu in Comitibus publicis sententia Banni proferri possit; Hinc non immerito quæritur: Num Imperator VI. juris restituendi famam, statum Imp. in bannum declaratum solus eximere, & juri ac honori restituere possit? an verò sicut in declaratione. ita & in relaxatione ejus, statum Consensum adhibere habeat necesse? Equidem Protestantium religioni addicti status desiderarunt in Monitis ad Capitul. Leopold. anno 1658. d. 27. April. exhibitis ad art. 28. ut ei sequentia infererentur: Das hinführo kein Ehur-Fürst, Fürst, oder Stand des H. Reichs ohne gnugsame Ursach, und ohne Vorwissen, Rath und Bewilligung gesamter Stände in die Acht, und Ober-Acht gethan, gebracht oder erklärt, und hinwieder aus derselben erledigt, genommen, oder gesprochen werden solle &c. Verum quoad passum relaxandi banni neque in dict. Capitulat. Leopold. neque in novissima Caroli. Desiderii sui effectum impetrarunt. Proinde mihi verior videtur opinio, quod Imperator solus, in bannum declaratum eximendi jus habeat; Nam omnia illa Majestatis jura Imperatori sunt, manentque propria, in quorum communionem ordines Imperii per capitulationes, Recessus, aliasque Imperii constitutiones non sunt intromissi; quia itaque communio, quæ facti est, in casu præsentis probari nequit, præsumptio stat pro Cæsare; præsertim, cum Imperii status ab initio, fuerit purus, idemque in iis, quæ non sunt mutata, præsumatur: Mixtus autem facti sit, & strictæ interpretationis. Nec obstat illa juris regula, juxta quam nihil tam naturale habetur, quàm eo modo unum quodque dissolvi, quo Colligatum est; ut proinde, cum sententia banni non-

D

nisi

nisi communi Procerum approbatione dictari valeat; collecta à contrariis arguendi ratione, etiam non aliter, quàm illorum consensu relaxari possit; Etenim ista à contrario arguendi ratio à iustitia ad Gratiàm, in præsenti ea propter locum habere nequit, quia inter casum condemnationis, & restitutionis manifesta apparet disparitas: Siquidem idcirco status Imp. contra sententiam Imperatoris condemnatoriam sibi prospectum esse voluerunt, quia ipsorum vel maximè interesse poterat, ne fortè subinde necdum satis auditi, aut sine iusta causa, cum maximo sui præiudicio ac damno, funestam proscriptionis sententiam, solo Imperatoris arbitrio subire cogantur; Cum è contra restitutio in integrum merus sit favor, puram gratiam ac commodum involvens, in quo, ut Imperatoriæ Clementiæ ac potestati limites ponerentur, nulla ratio suavit. Quod si tamen propter aggratiationem, alicui ex Imperii statibus, cum cæterorum consensu condemnato, nunc concedendam, Imperium perturbari, ac motibus periculosis implicari posset: Si quis tunc Procerum quoque requirat consensum, illi haud repugnarem, sed potius adstipularer, motus Capitulationibus Cæsarum, quæ in omnibus magni momenti Causis, principaliter publicum Imperii interesse concernentibus, so das Reich betreffen / Electorum, aut omnium statuum consensum requirere videntur. *Capitulat. Noviss. Caroli VI. art. 11. in fin.*

§. VI.

Alia insuper occurrit quæstio: *utrum scilicet Imperator Jus Aggratiandi in statum Territoriis exercere, ac delinquenti, ut in priori Domicilio impune maneat, Gratiàm*

con-

concedere possit. Pro Negativa sententia militare videtur ratio ista, quod status Imperii in concessis sibi Regalibus privative, non autem cumulative sint investiti, nec in exercitio jurisdictionis impediendi sint. *BOCER. de Jurisdic. C. 8. n. 80.* In quam opinionem inclinat *HERMES in fascicul. jur. publ. Cap. 11. n. 123.* Ubi tamen addit, hoc ipsum altiore desiderare indaginem juxta *BESOLD. de Jurib. Majest. C. 4. n. 4.* Affirmativam è contra amplexus est *LANGGVT. in Animadvers. in Coccej. prud. jur. publ. ad Cap. 23. §. 8. n. 3.* Quanquam enim potestas gladii, sive merum Imperium statibus absque provocandi seu appellandi facultate datum sit. *O. C. p. 2. tit. 1. §. 1. tit. 28. §. 5. SCHWEDER. in Jur. publ. part. spec. Sect. I. c. 13. §. 11.* id tamen per dispensationem Imperatoris violatum dici nequit, quippe qua non causæ cognitio & sententiæ dictio, sed effectus hujus solum, salva jurisdictione alta eorum, quibus concessa, per Gratiā superioris, justis ex causis impertitam, suspenditur; quemadmodum in simili nec imperium merum, Nobilibus mediatis per modum feudi concessum, imminuitur, si quando à concedente superiore poena ab ipsis dictata per dispensationem mutatur. Quanquam autem in hac quæstione arbitrium decidendi mihi non arrogem, non ignarus quàm temerarium sit, de hujus generis controversiis privato ausu pronuntiare, affirmativam tamen sententiam verò magis consentaneam esse existimo.

§. VII.

Quemadmodum autem non vacante solo Imperio, aut Imperatore jam demortuo, sed illo etiam vitam

ad huc ducente, & Imperante Rex Romanorum quandoque eligitur; quod consentiente Imperatore, iund & non nunquam eo invito fieri posse, Capitulationes Cæsareæ probant; Cum quo conveniunt verba Capitulationis Augustissimi regnantis Imperatoris CAROLI VI. *art. 3. ibi*: Mit oder ohne des regierenden Römischen Kaysers consens; wann derselbe auf angelegte Bitte ohne erhebliche Ursach verweigert werden sollte, vorgenommen. Ita disquiri solet: utrum Rex Romanorum, Imperatore lucis usurâ adhuc fruente electus, hanc Aggratiandi potestatem habeat? quod regulariter negandum videtur, quia nondum ipsi administratio Regni est commissa. REINKING. *de R. S. & E. L. 1. Class. 3. Cap. 14. n. 46.* CARPZOV. *de Lege Reg. C. 11. Sect. 5. n. 15.* Unde & ipsi Majestas actualis denegatur. WERMSENER. *Exercis. jur. publ. 3. quest. 3.* Cum & Imperatorem ut superiorem recognoscat, ipsumque Dominum suum appellet. *Recess. Imper. de anno 1555. §. solches alles und jedes. 143. ibi*: Die Kaysersliche Majestät unsern lieben Bruder und Herrn etc. Quatenus tamen Rex Romanorum, absente Imperatore vel impedito, ejus dum vires gerit, *dict. Recess. Imp. §.* und sollen in oberzehlten Fällen. 64. eatenus, illum hanc quoque potestatem exercere posse, dubitandum non est. *Recess. Imp. de anno 1542. §.* Die Kaysersl. Majest. und wir. *item de ao. 1544. §.* Wir und unser freundlicher lieber Bruder etc. Qui textus ad casum absentiae Imperatoris rectè referuntur à LIMNÆO *de Jure publ. Lib. 2. C. 15. n. 40.* Et enim illum tunc omnia, quæ ab ipso Imperatore præsente peragenda forent, facere posse testatur REINKING. *ibid. cap. 14. n. 48. & 63.*

§. VIII.

Cæterum cum vacante ab Imperatoribus Imperio, ob moram longiorem, quæ in novo eligendo Imperatore non nunquam intercedebat, & ne tempore inter regni Respublica ad instar navis, Rectore destituta, detrimenti quid patiatur, ad certos Vicarios, Comitem nim. Palatinum, Rheni, & Ducem Saxoniae Electores, Cura Regni saluberrimè sit delata, *A. B. Cap. 5.* Et illos hoc jus Aggratiandi habere, rectè dicitur. potestas namquè illorum in non prohibitis & specialiter exceptis, cum potestate ipsius Imperatoris, tere est æqualis, adeò, ut quoties sacrum vacare contingat Imperium, illi omnia Imperatoris Jura, quamvis in *A. B. d. l.* non expressa, dummodo non specialiter inveniantur prohibita, & in specie quoquè ea, quæ *Dd.* Gratiola dicuntur, exercere queant. *BUXTORFF. ad A. B. Cap. 5. th. 71. §. 73. ARVM. ad B. discuss. 5. th. 7. SCHÜTZ v. 1. Disp. 5. th. 12. SCHWEDER. Jur. publ. part. spec. sect. 1. Cap. 33. n. 8.* frustra dissentiente *VITRIARIO Inst. Jur. publ. lib. 3. tit. 7. §. 9.* Controversiam verò illam gravissimam, quæ post pacem Westphalicam Setenissimos inter Electores Bavarum & Palatinum anno 1657. de vicariatu agitari cæpit, de qua vid. *SCHWEDER. d. l. BVCKISCH ad Instrum. pac. Osnabrug. art. 4. obs. 4. §. 15.* hic consultò prætereo, tum quia ab instituto meo longius abit, tum quia meum non est, licet hanc dijudicare, qui didici, de iis non disputare, qui possunt amputare, nec scribere, qui possunt proseribere.

Alterius beneficia hanc Aggratiandi potestatem

habent illi, quibus ab eo, penes quem summa in Republica potestas residet, tacite vel expresse est concessa, veluti in nostro Imperio vi superioritatis Territorialis omnes status, sive Ordines Imperii obtinent; siquidem juri Territoriali, non jurisdictionalia tantum insunt, merum scilicet & mixtum imperium; seu secundum hodiernam consuetudinem superior & inferior jurisdictio: sed multa quoque Majestatis, seu Regalia jura, quæ in ipsa Imperatoris Capitulatione, non Electoribus solum, sed cæteris quoque Principibus ac statibus confirmantur, uti videre licet non tantum in Antiquioribus, sed & in *Capitulat. novissima Caroli VI. art. 1. & 2.* quanquam autem varia insignum supremæ Eminentiae, Imperatori sint reservata: quin tamen hoc poenas remittendi, seu Aggratiandi jus superioritatis seu Territoriali juri cohæreat, & omnibus jus Territoriale habentibus competat, nullus dubito, attestantibus hoc ipsum MYLER, *de Princip. & Stat. Imper. Cap. 50. n. 13.* SCHWEDER, *part. spec. Sect. 2. Cap. 14. §. 4.* VITRIAR, *Inst. Jur. publ. lib. 3. tit. 16. n. 112.* LIMN, *de jur. publ. lib. 4. C. 8. n. 269.* KNICH, *de Jure territor. C. 3. n. 244.* & generaliter ab omnibus Imperii statibus, hoc summum Imperii munus practicari, neminem latere, inquit BESOLD, *de Civit. German. part. 1. C. 7. 1b. 20.* Unde CARPZOV, *prax. Crim. part. 3. q. 150. n. 26.* Scabinos Lipsienses nunquam dubitasse refert, jura territorialia habentes, reis gratiam facere, & poenam vel mitigare, vel remittere posse. Hinc passim apud CARPZOV, *diff. prax. Crim.* in illorum præjudiciis legitur: *Wosern die hohe Obrigkeit/ oder Lands-Fürstliche Obrigkeit des Orts/ dem Gefangenen nicht Gnade erzielen wolle.* Neque ab hoc

hoc Aggratiandi, siue poenarum veniam concedendi jure, civitates Imperii immediatae sunt excludendae. CARPZOV. d. l. q. 150. n. 19. KNIPSCHILD. de Civit. Imper. lib. 2. Cap. 27. n. 1. sqq. ad stipulatur HVNN. Coll. Crim. Disp. 15. th. 21. illudque à dictis Civitatibus quotidie practitari, refert. quamvis enim superioribus annis res velut novam minusque audita Principibus erat, dicere civitates *status Imperii*, teste LEHM. in Chron. spirem. lib. 4. unde & KNICH. dict. rr. illis territorij vel superioritatis jura ausus est denegare; verum per *Instrum. pac. Westphalicae art. 5. §. 29.* res penitus definita, ipsasque civitates Imperii liberae sub appellatione statuum Imperii ubique contineri decisum est.

§. X.

Cæterum etiam aliis, qui status Imperii non sunt, potestatem Aggratiandi, per Præscriptionem temporis cujus origo memoriam excessit, vel cujus initii memoria non extat, acquiri posse eò minus dubito, quo certior & in camera quoque imperiali sæpius comprobata, nec non penè infinitis Dd. Testimoniis comprobata est sententia, quod temporis immemoralis præscriptione, quæ privilegii, ac expressæ concessionis vim habet, Regalia acquirantur. BOCER. de Regal. C. 4. GAIL. lib. 1. obs. 21. n. 15. & lib. 1. de P. P. C. 6. n. 11. CARPZOV. part. 2. Const. 53. def. 1. n. 13. ARVMÆ. Disp. feudal. 4. th. 21. ZANGER. de Except. part. 3. C. 8. n. 65. quod autem in specie, ad hujus aggratiandi Juris præscriptionem, cursus immemoralis temporis requiratur, satis superque demonstrat FARIN. prax. Crim. part. 4. lib. 1. Consil. 3. n. 7. Cæterum quodnam temporis spatium hoc immemoriali tempore proprie

prie denotetur, inter Dd. nondum convenit: Sunt enim, qui ad illud probandum centum annorum requirunt probationem, uti HAVNOLD. BACHOV. REINKING. citati à LAYTERB. *Colleg. Theor. pract. tit. ff. de Usurp. & usu cap. §. 44.* Verum cum hi Centum annorum & temporis immemoralis præscriptionem confundant, cum tamen tempus Centenarium & memoriam excedens, unum idemquè non sint. GROT. *de Jur. B. & P. lib. 2. C. 4. n. 7.* illorum sententiæ subscribere nequeo. Enim verò in centenaria præscriptione Centum anni necessario veniunt probandi, nihilquè refert de tempore, quo, & quando quid initium cœperit, constet, nec ne. At in præscriptione immemoriali, nec semper sufficiunt, nec necessarii semper sunt centum anni; Accidit nimirum quandoquè, ut memoria ab 80. aut 90. terminetur annis. CARPZOV. *p. 1. C. 16. def. 74. n. 13.* Et licet, rei veritate inspecta, minus centum annis ipatium sit præterlapsum, si tamen de facto & rei initio nulla extet memoria, testesquè secundum LABBONEM in *L. 28. ff. de probat.* deponant; se nec vidisse, cum id opus fieret, nec ex eis audivisse, qui vidissent, aut audivissent: Præscriptionem tamen eo in casu impletam esse indubiè assero; & contra etiam si centum quis probaret annos, si tamen de rei initio memoria adhuc extaret, illos ad hanc præscriptionem haud sufficere certum est. LAYTERB. *dict. loc.*

§. XI.

Econtrario inferiores iudices atquè Magistratus, mero Imperio, sive Jurisdictione superiori tantum gaudentes, quibus ab Eminentiori quadam potestate hoc Regale jus Aggratiandi, tacitè vel expressè non est concess-

cessum, delictorum veniam Reis facere, poenasque iisdem remittere haud quaquam possunt. Hinc quamvis in nonnullis civitatibus Magistratus inferiores potestatem gladii habeant, & Nobiles quidam aut Barones Imperio mediatè subjecti, cum Jurisdictione inferiore & superiore à statibus Imperii ut plurimum investiantur; Regalia tamen nunquam, aut rarissimè consequi, sed status in eorum feudis sibi solent reservare; & habent quidem prædicti inferiores Magistratus vi competentis jurisdictionis superioris seu criminalis potestatem de Criminibus judicandi, atque secundum modum à Legibus præscriptum coercendi: Verum ut poenam Legibus definitam, aut remittant, aut minuant, hoc sanè illorum excedit potestatem. TIRAQV. El. de poen. temper. præfat. n. 2. seqq. Hoc namque haud esset, secundum Leges judicare, atque crimina punire; sed contra Leges agere, de illis dispensare, iisque derogare: quod planè ad aliam & specie quidem diversam, illisque vi jurisdictionis omnimodæ minimè competentem pertinet potestatem. Nec obstat quod secundum *L. 3. ff. de Re judic.* qui dammare potest, is absolvendi quoque potestatem habeat. Etenim hæc Regula de causa quadam justitiæ, absolutionem Rei exigente, tantummodo intelligi debet. Hinc MARCIAN. in *L. 1. §. 4. ff. ad sc. Turpill. inquit. Facti quidem questio in arbitrio est judicantis, Poenæ verò persecutio non ejus voluntati mandatur, sed legis auctoritati reservatur* & in genere præcipit Imp. JUSTINIAN. in *Nov. 80. Cap. 10. ne judex sit clementior lege, aut ipsis Legibus Severior.* Eleganter sanè & accommodatè SYMMACH. *lib. 10. Epist. 63. inquit: Alia est conditio Magistratuum,*

E

quæ

quorum corruptæ videntur esse: sententiæ, si sint Legibus mi-
niores: Alia Divorum Principum potestas, quos decet acri-
moniam severi juris inflectere. Nimirum ejus est deroga-
re legibus, & de illis dispensare, cujus est legem ferre:
Et quamvis statuta condendi potestas, inferioribus quo-
que Magistratibus dicatur competere; contra Leges ta-
men publicas absque superioris consensu nihil valent
disponere. SCHVLZ. *synops. Instit. de L. N. G. & Civ. lit. h.*
neque Jurisdictionalia cum Regalibus, quibus Jus Ag-
gratiandi recte annumeratur, sunt confundenda. CARP-
ZOV. *prax. Crim. p. 3. q. 150. n. 51.* unde in *L. 3. C. de sanct.*
Baptism. iteretur. dicitur: *Nulli Judicium liceat, delatum*
ad se crimen minori aut nulli Coërcitioni mandare, nisi ipse
idem pati velit, quod aliis dissimulando concessit. Hinc Carol.
I. Rex Siciliæ, suspendi judicem jussit, qui reum suspen-
diti dignum, ad manus tantum amputationem conde-
mnaverat. HEIG. *2. q. 22. n. 18.* PEREGRIN. *de Jur. fsc. lib. 4.*
C. 8. n. 23. seqq. Atque hæc in tantum procedunt, ut,
si judices semel sententiam dixerint, eam nequidem ex
causa innocentiae postea repertæ, inconsulto Principe,
mutare valeant. *L. I. §. ult. ff. de question. L. 27. pr. ff. de*
Pæn. quod tamen hodie Magistratibus, Criminali Ju-
risdictione gaudentibus facilius tribui solet, si error evi-
denter, Reusque innocens appareat. BOHMER. *ad ff. de*
sent. Pass. & restit. §. 3. BRUNNEM. *ad dict. L. 27. in fin.*

§. XII.

Ex antè dictis facile quoque judicare licet, Judicem
seu Magistratum Inferiorem, merum tantum Impe-
rium habentem, Reo impunitatem, ut delictum fatea-
tur, promittere non posse; Quod si verò nihilominus
ejus-

ejusmodi promissio facta, & Reus per illam ad confitendum crimen inductus fuerit; confessionem istam ad condemnationem poenæ saltem ordinariæ, minimè sufficere prolixè tradit FARINAC. *Qu. 81. n. 76.* Neque approbare possum sententiam, quam LUDOVICI Einleitung zum peinlichen Process. c. 5. §. 9. Cum FINCKELTH. *ibid. cit.* tenet, scilicet judicem, si sub promissione impunitatis confessionem criminis à reo obtinere possit, prudenter agere, huncque ipsum actum pro dolo bono æstimandum, & reum nihilominus postea poena promerita afficiendum esse. Siquidem vanus potius & mendax talis judex est habendus, qui id promittit, quod suæ potestatis & arbitrii non est. Et cujus promissionis fidem datam implere nequidem cogitat. BRUNNEM. *in process. inquis. C. 8. membr. 1. n. 53.* Plura de hac impunitatis vel poenæ mitigationis promissione, per judicem inferiorem factâ, legi merentur apud CARPZ. *prax. Crim. p. 3. quest. 149. à n. 1. usque n. 22.*

§. XIII.

Quæ huc usque de inferiore Magistratu, ipsique non competente Jure aggratiandi dicta sunt, non solum de totali remissione, sed de partiali quoque, seu mitigatione poenarum accipienda esse, ex *cit. L. 3. C. Ne sanct. Bapt. iteret. satis constat.* Conf. *L. 8. §. fin. C. de vi publ. & pract.* Cui igitur Criminalis tantum competit Jurisdictio, is mortis supplicium, in mitiorem, fustigationis scilicet, relegationis, carceris, aut pecuniariam poenam minimè poterit commutare. WEHNER. *Obs. pract. voc. cent.* Eadem ratione poenam mortis severiorem, lege expressa determinatam, puta ignis, rotæ, suffoca-

tionis in aquis, suspendii &c. In aliam mitiorem mortis, v. g. gladii pœnam, haud quaquam potest convertere; esset enim alias Clementior lege. Contra Nov. 82. C. 10. imò contra leges ageret, de iis dispensaret, & sic competentis Jurisdictionis fines manifestè excederet. L. 1. §. 4. ad Sc. Turpill. L. 15. pr. ff. de pœn. Itaque hanc pœnarum alterationem, seu mitigationem, æque de Regalibus, ac ipsam totalem remissionem esse existimo. Proinde de pœnis non Capitalibus remittendis aut mitigandis v. g. fustigationis, relegationis, carceris, non sane diversum, sed idem de jure statuendum esse arbitror; siquidem supra allegatæ Leges, & adductæ rationes hic quoque inveniunt locum; Nam qui fustigationem Lege præfinitam remittit, aut in pœcuniariam convertit, quomodo minus contra legem agat, aut Lege se præbeat clementiorem, ac ille, qui de Capitali aliquid remittit, haud valeo perspicere. Et in hanc sententiam Nobili cuidam, merum & mixtum Imperium habenti, quod scil. fustigationis pœnam in pœcuniariam convertere non possit, responsum esse, refert HEIG. lib. 2. quæst. 22. n. 23. In terris tamen Electoris Saxonici magistratibus inferioribus, criminalem Jurisdictionem habentibus, hæc pœnas non capitales minuendi, & v. g. pœnam fustigationis in simplicem relegationem probabili causâ suadente, mutandi potestatem competere, testatur CARPZOV. prax. Crim. cit. q. 150. n. 75. seqq.

§. XIV.

Cæterum prædicta omnia de gratiosa pœnarum remissione, aut mitigatione, ex jure nimirum Aggratiant-

tiandi proveniente tantum intelligenda sunt; Etenim quin iudices Criminale Tribunal exercentes poenam, ordinariâ & legibus determinata mitiorem, aliquando per viam justitiæ possint, imo debeant imponere mihi certè indubium, & jam jam supra *Cap. I. §. IV.* pluribus insinuatum est. Furioso namque, infanti, aut casuali homicidæ, si nullam; Culposo verò ordinaria minorem iudex imponit poenam, justam sanè & in coercitione observandam proportionem observat; nec contra leges quidquam agit, neque lege est Clementior, sed id, quod leges jubent, exequitur, proin potestate sibi competente debito modo utitur. Nam poenæ, ipsa hoc justitia efflagitante, justa ratione delicti commensurari, illiusque qualitati debita correspondere debent proportionem, ita, ut qui plus deliquit, gravius, qui minus, levius coerceatur, semperque inter delictum & poenam justa attendatur æqualitas. *L. ii. pr. ff. de poen.* Interim tamen iudici probè perspicendum est, ut in hisce casibus, quibus justam aliquam, ipsumque delictum imminuentem ob causam, pro ordinariâ mitior venit imponenda, non statim capitalem, in pecuniariam convertat poenam. Dantur enim & aliæ poenæ, quibus Reus, cessante poena capitis, extra ordinem mitius puniri poterit; & exemplo sanè est perniciosum, remissa poenâ capitis, nonnisi pecuniarias poenas reis infligi; quippe cum hoc iudicibus in alienis grassandi facultatibus occasionem præbeat, uti prudenter monet ANTON. MATTH. *de criminib. ad lib. 48. ff. tit. 18. C. 4. n. 12.* Ubi quoque SFORT. ODD. rectè reprehendit iudices, qui ut plurimum poenam mortis convertunt in

E 3

pectu-

pecuniariam, non ut ætati, aut culpæ veniam dent, sed ut crumenas loco Capitis evacuent. Consentit VALENTIN. WINTHER. in *parthen. litig. lib. 1. C. 14. n. 2.* Ita scribens: Hoc malitioso sæculo Criminalistæ non absimiles Chirûrgis, qui ut multis hominûm vulneribus, ita hi plurimis subditorum delictis gaudere solent, facilem nacti spoliis alienis penus suæ locupletandi occasionem, unde in multis indicendis lætantur, & impie dicunt: Es haben dieses Jahr über die Brüche oder Geld-Bußen / Gott sey Lob und Dank, ein Ehrliches ertragen.

§. XV.

Magistratus inferiores, pœnas pro meritis remittendi, aut mitigandi jure haud gaudere hætenus dixi; quod tamen cum grano salis accipiendum, quia unam & alteram limitationem recipere videtur. Et primò quidem, in casibus illis, in quibus lex ipsa hoc concedit: cujus exemplum legimus in *L. 37. §. 1. ff. de Minorib. ibi. nisi quatenus interdum miseria ætatis ad mediocrem pœnam judicem produxit.* Ad hanc namquæ mitigationem intuitu minoris ætatis faciendam, non per viam Justitiæ judicem adstringi: sed illam ex commiseratione & gratia tantum fieri posse, ostendit, & contra communem Dd. opinionem probat CARRZOV. *quest. 143. n. 59. seqq.* id quod scabini Lipsienses in suis ibidem subjunctis responsis indicant: Und ist dem Rath zu Torgau die inquisito zu erkandte Straff des Rades / von wegen seiner Jugend zu lindern / und ihn mit dem Schwert richten zu lassen / unbenommen & in alio contra Reum, qui nec dum 18. annos compleverat, concepto: so möchte er solchen seiner begangenen

Dew

Deuben und Kirchen-Raubung halber/ mit dem Rad von Leben zum Tod gerichtet werden; Man wolte ihm dann in Ansehung seiner Jugend/ Gnade erzeigen/ auf solchen Fall wurde er mit dem Schwerdt von Leben zum Todt gerichtet/ und gestroffet. Secundo limitatur: si ex illorum statutis poene aliqua veniat imponenda: Etenim illam non tantum in totum tollere possunt, sed & mutare ac mitigare. Hinc Dd. communiter tenet sententia, quod, licet civitates & Collegia contra infamiam, jure communi impositam, non possint restituere; famam tamen, ex illorum statutis imminutam, restituere haud prohibeantur. LIMNÆ. *de jure publ. lib. 4. C. 8. n. 303.* MEY. *ad Jus Lubec. L. 4. tit. 15. art. 1. n. 9.* Hinc studiosos relegatos, à Rectore ac Senatu Academico non raro restitui, ac in numerum studiosorum recipi, vulgaris testatur observantia; Idquē in Jenensi universitate observari tradit THEODOR. in *Colleg. Criminali Disp. 10. th. 7. lit. b.* Et ex Wittenbergensi Academia relegatum & exclusum, post aliquot annos, abolitā per restitutionem infamiā, in quam per exclusionem inciderat, fuisse restitutum, refert HEIG. *part. 2. Quest. 22. n. 43.* ZIEGLER. *de jur. Majest. lib. 1. C. 9. n. 1.*

CAPVT. III.

De objecto, sive materia juris Aggratiandi.

§. I.

Consideratis huc usque personis, quibus Aggratiandi jus competit, ordo nunc ad objectum, circa quod illud versatur, contemplandum me deducit. Hoc autem ex definitione superius Cap. I. §. 4. tra-

traditâ, haud obſcurum eſt; Dixi enim ibidem, Juſ Aggratiandi legitimam eſſe Reis *promeritas Criminales* pœnas remittendi poteſtatem. Ex quo objectum juris Aggratiandi, quod *pœnæ promeritæ* conſtituunt; manifeſtum redditur.

§. II.

Unde non immeritò diſquiri ſolet, an Princeps cuſſuſvis pœnæ gratiam Reo facere poſſit? atquè inprimis in eo non omnes concordant; ſed graviffima eſt Quæſtio: *Utrum ſupremus Princeps, aut ſtatus Imperii juſ Aggratiandi poſſint exercere in delictis illis, quibus in Lege Divina na veteris Teſtamenti pœna Capitalis eſt præfixa; quale eſt Homicidium; quod Gen. 9. v. 6. Levit. 24. v. 17. Exod. 21. v. 12. morte puniri jubetur.* Si conſulo J Ctos proteſtantium Religioni addictos, plerique negativam defendunt ſententiam, dicentes, in criminibus, quorum turpitudine ex jure Naturæ conſtat, & quibus ideò Deus ſummus legiſlator mortis ſupplicium determinavit, Principes diſpenſandi poteſtate eſſe deſtitutos, inter quos ſunt, HEIG. p. 2. q. 24. n. 42. CARPZOV. p. 3. q. 150. n. 31. ſeqq. REINKING. in ſœp. cit. tr. lib. 1. Claſſ. 5. Cap. 6. n. 206. VITRIAR. Inſt. Jur. publ. lib. 3. tit. 17. n. 114. ſeqq. PFEFFINGER. ibid. ad. n. 112. lit. a. SCHWEDER. Jur. publ. part. ſpec. ſect. 2. Cap. 14. §. 6. STRIK. de Abſolut. Princip. C. 3. n. 33. MYLER. de Princip. & Stat. Imp. p. 2. c. 50. n. 15.

§. III.

Rationem pro hac ſua negativa ſententia assignare ſolent: partim, quia hæc pœna non ſolum in homicidas judæos, ſed univerſim in omnes homines, hominem occiſentes, a Deo ſtatuta, & pœna mortis in prima & antiquiſſ.

tiquissima lege, de vindicandâ occisi nece, unica expiationis forma posita esse videtur. *Gen. d. Cap. 9. vers. 6. ibid. quicumque effuderit, humanum sanguinem fundetur sanguis illius. ad imaginem quippe Dei factus est homo: juncto Numer. C. 35. v. 16. 20. & 33. partim, quia dictamen Naturale præcipere videtur, ut, qui ex enormi malitia vitam alicui adimere non est veritus, pœnam Talionis sustineat; Cum alioquin cæteris, ne & ipsi talia patiantur, satis prospectum non sit. partim, quia in hoc delicti genere commiseratio nominatim prohibetur. Numer. C. 35. v. 31. & homicidium dolosum qui commiserunt, assylorum jure non gaudebant, sed ab Altari Domini avelli & occidi jubentur. Exod. C. 21. vers. 14. unde sic arguunt: Inferior non potest abolere Legem superioris, prohibentis misericordiam cum homicidis, & sanguinem pro sanguine reposcentis; Ergo nequæ Principes, homicidii dolosi reo, pœnam capitis in divinis Legibus statutam remittere possunt, sed deo submittere senecesse habent. Inde quæ in *Can. non licet; 2. Dist. 10. appositè dicitur, non licere imperatori aliquid contra divinam mandata præsumere nec quicquam, quod Evangelicis Propheticis, aut Apostolicis regulis obiret agere. Et D. AMEROS. in Can. Convenior. 21. Caus. 23. quæ 8. noli, inquit, Imperator, ut putes, te in ea, quæ divina sunt, imperiale aliquod jus habere: noli te extollere, sed si vis diutius imperare esto Deo subditus. præterea Ethnici etiam iniquum judicarunt, vitæ gratiam illi fieri, alii qui vitam eripuit; ipsi enim, quanta in absolvendo homicida cautione usi fuerint, vel ex exemplo, & eleganti Tullii Romanorum Regis discursu de Horatii parricidio apud HALYCARN. lib. 3.**

F

poterit

poterit cognosci. Principes itaque nisi cum Davide, filio fratricidæ parcente, divinæ justitiæ iram, probra & contumelias provocare, & regno malint periclitari 2. *Regum* 15. abstinere ab hujusmodi atrocissimi delicti gratia, & mandata Divina potius exequendo, ac homicidas promerita poena puniendo, Territoria sua ab innocenti sanguine expiare debere asserunt, haud respicientes, Regis filius sit homicida, vel alius, plebejus an nobilis. CARPZOV. p. 1. *quest.* 2. n. 8. *seqq.* Hinc laudatissimum Poloniæ Regem Stephanum, barbarum & impium illum morem, quo nobiles cædem perpetrantes, se impunitate gaudere, & facinus certâ ac exili quâdam pecuniæ summa, occisi corpori imposita, redimere posse contendebant, prudenter ac justè sustulisse, ac homicidas dolosos sine personarum respectu plectere jussisse dicunt, hac additâ ratione: *Illam Legem divinam esse, qua sanguis ejus, qui humanum sanguinem fudit, rursus fundi jubetur, longeque vetustiore illâ, quam allegabant, consuetudinariâ.* WINTHER. in *parib. litig. lib.* 1. C. 13. n. 11. Et adducta hucusquæ de simplici homicidio, quin æquæ, imò multò magis in Parricidio, Infanticidio, Fratricidio, Matricidio, Uxoricidio, Latrocinio, Assassinio, Veneficio, obtineant, sententiæ hujus negativæ Patroni non dubitant; Etenim *multis LL. reus est*, inquiunt cum PLATONE qui parentem occidit, *est possibile esset, sæpius aliquem mori, justissimum foret, Parricidam sæpius occidi*; quia publicæ vindictæ convenit, hoc tam enorme scelus, publicè & atrocissimè vindicari. L. I. ff. de *obseq. par. præst.*

§. IV.

Verum hisce omnibus non obstantibus, si genuina
juris

juris principia trutinemus, affirmativa longe solidior mihi
 videtur sententia, quod nimirum etiam in hisce pœnis Prin-
 ceptis, aggratiandi jure gaudens Gratiâ Reo facere possit,
 & supplicium mortis condonare. Ita præter alios ex Ca-
 tholicis docent. FRANCISC. SCHMIEB. *Jurispr. publ. universal.*
lib. 3. Cap. 2. Sect. 3. §. 3. n. 175. & in Jurispr. Canon. Civ. Lib. 5. tr.
1. Cap. 3. n. 73. seqq. SIGISM. STARFF. *Tract. de Majest. Cap. 7. §. 4.*
 COVAREVV. *Var. Resolut. lib. 1. Cap. ult. n. 8.* à CARPZOVIO perpe-
 ram in suas partes vocatus, his è protestantibus accedunt,
 PFENDORF. *de Jure Nat. & Gentium lib. 8. C. 3. §. 20.* THOMA-
 SIVS in *Diss. de Jur. Aggratiandi Princip. Evangel. in caus. homicid.*
 ICTI HALLENSES in *Responsa à Thom. ibid. in fin. adjecto.* Ratio
 autem hujus sententiæ præcipua est: quia pœnarum jure
 Divino Veteri injunctarum amplissima series non pertinet
 ad Leges Morales seu Naturales, utpote quæ licet in genere
 punitionem fontium demandent, attamen gentis, quantita-
 tem pœnæ non determinant; sed spectat ad Leges tantum
 positivas & Judiciales; fuitquæ ab initio quidem pro Noë
 mo, & tota illius posteritate à Divino Numine promulgata,
 postea verò Reipublicæ Judaicæ specialiter per Moysen pro-
 posita. *Levit. 24. vers. 17. Exod. 21. vers. 12.* consequenter in
 Novo Testamento, ubi Leges ejusmodi Judiciales ex se vim
 amplius non obtinent, pœna Capitalis, pro homicidiis statu-
 ta, non aliter efficaciam sortitur, ac si in aliqua Republica
 liberè fuerit recepta: quemadmodum pœnam mortis in mo-
 rechum & adulteram; *Levit. C. 20. v. 10.* nec non in eum, qui
 coierit cum muliere in fluxu menstruo, *Levit. dist. C. 20. vers. 18.* sanc-
 cita; ac in filiam sacerdotis, si deprehensa fuerit in stupro,
ibid. Cap. 21. v. 9. & in sponsam defloratam *Deuteron. C. 22. v.*
24. item in eos, qui parentes verberaverint, auribus maledi-
 xerint, *Exod. 21. v. 15. & 17.* decreta, unà cum multis aliis, in
 pluribus saltem locis, pridem exolevisse cernitur. Quod au-
 tem statim post diluvium hæc pœna. *Genes. 9. v. 6.* statuta le-
 gatur, varix sunt Dd. interpretationes; è quibus illa præ-
 placet, aut pœnam illam non fuisse propositam sub obliga-
 tione respectu potestatis Politicæ, ut eam semper & in omni

homicidio teneatur, exigere (nam & de bestiis, si hominem occiderint, sanguinem requirendum esse pater ex eodem loco *vers. 5. addat. Exod. 21. v. 28.* quæ tamen hodie ob tale facinus vix ullo amplius in loco occiduntur) sed magis, ut, si iudex voluerit, factoquæ convenientem videat, possit eam imponere, & delinquens, noxæ convictus nequeat eam reculare; aut, si fuerit proposita sub obligatione, eandem non diutius durasse, quàm ad tempus Legis Gratiæ: sicut nec obligatio, occidendi animal mortiferum, de quo in *d. vers. 5.* nec obligatio, à carnis & sanguinis commissione abstinendi, de qua in *dict. Cap. 9. Gen. vers. 4.* virtutem suam ad idem Gratiæ tempus extendit.

§. V.

Hoc igitur supposito, quod pœna Criminum, à Deo in Lege veteri constituta ad Leges tantum positivas & judiciales, pro commodo & statu Reipublicæ Judaicæ, sanctitas pertinuerint, sic licet arguere: Leges veteris Testamenti amiserunt suam vim in testamento Novo. *Cap. 1. de purificat. post part.* Ergo Leges veteris Testamenti, pœnam mortis v. g. homicidio præstituentes, tanquam judiciales, non obligant in Testamento Novo. Ergo Princeps, qui pœnam mortis homicidæ condonat, nihil agit adversus Legem Divinam, sed tantum in Lege humana dispensat. Ergo per jus Aggratiandi pœnam Legalem mortis relaxare valet. *Confirmatur Discursus:* quamvis in Lege Antiqua Matrimonium inter consanguineos in multis gradibus fuerit prohibitum, ut constat ex *Levit. C. 18.* attamen in huiusmodi gradibus S. Pontifex potest dispensare, veluti definitum per *Concil. Trident. Sess. 24. de Matrim. Can. 3.* Etgo etiam superior Princeps dispensare potest in pœna Capitali, quamvis in Lege antiqua jam fuerit statuta: quia scilicet Lex antiqua neque in prioris matrimonii, neque in posteriore pœnarum casu, est moralis & naturalis.

§. VI.

Neque de praxi & exemplis hujus affirmativa sententia dubitandum: Atque hic in veteri iam Testamento occurrit.

currit præ cæteris exemplum duplex Regis Davidis, viri secundum cor Dei, non solum jus aggratiandi serio exerce-
re volentis in casu à foemina Thecuacensi ficto, sed etiam
statim sine hæsitacione ad intercessionem foemina illius, &
Joabi dispensantis, in casu vero, intuito deliberati & in-
didioli fratricidii, quod Absolon adversus fratrem Amnonem
perpetraverat. 2. Reg. C. 14. Et quamvis alias David,
si contra præceptum Divinum perperam quid fecisset, cor-
reptus fuerit à Prophetis, ob hoc tamen poenam homicidii
dolosi condonantis factum, nequidem ulla admonitio ipsi
à Prophetis facta est. In Novo Testamento ex ipso Asylo-
rum jure, quo dolosi etiam delinquentes & homicida,
paucis exceptis gaudent, *D. ad Tit. X. de Immunit. Eccles.*
satis apparet, poenam hujusmodi Capitalem posse con-
donari, præsertim cum in primitiva Ecclesia non tantum san-
cti patres hæc asylo-
rum jura defenderint, & violatores eo-
rum excommunicationis fulmine percusserint; D. AUGV-
STIN. *Epist. 187. relata in Can. 8. Caus. 17. q. 4.* D. CHRYSOSTOM.
Tom. 2. Homil. 19. verum etiam pro homicidis dolosis, ne
capitaliter puniantur intercesserint. Idem D. AUGVSTIN.
Epist. 158. seqq. ubi pro ipsis Donatistis, qui Catholicos pres-
byteros persecuti erant, & occiderant, atque ita vel maxi-
mè poenam capitis meruerant, intercedit, eosque citra
mortis supplicium castigandos esse monet; quod si autem
magnus ille Hipponensium Præsul Capitalia supplicia in ho-
micideas jure Divino Naturali, vel jure aliquo Divino posi-
tivo perpétuo, indispensabiliter constituta esse scivisset,
quod neutiquam, sin ira fuisset, ignorare poterat, profe-
cto pro Donatistis tot homicidiorum reis minime inter-
cessisset, HENICH. *Consil. de dispens. circ. pan. homicid.* quod
extrat tam apud THOMAS. d. *Dissert. in fin.* quam apud L V-
DOVICI *ad Const. Crim. Caroli V. post præfat.*

S. VII.

Restat nunc, ut argumenta, quibus contraria Negantium
sententia innicitur, paucis diluantur; Et quidem præcipuum
illud ex Divinis Antiqui Testamenti Legibus peti-
tum per ea,

quæ hucusque adduxi sua spontè concidit; Negatur itaque etiam, quod Princeps, homicidæ gratiam faciens Legem superioris aboleat: utpotè cum pœnæ criminales in Lege Gratiæ non obligent ex Lege Divina, sed humana, quam non solum Imperator, sed etiam ex communicatione potestatis Territorialis quilibet Imperii status immutare potest. Solent quidem Dissidentes etiam adducere dictum Christi ad Petrum, apud MATTHÆ. Cap. 26. v. 52. *Converte gladium tuum in locum suum. Omnes enim qui acceperint gladium, gladio peribunt.* At juxta COVARETV. *Var. resol. lib. 2. Cap. 9. n. 2. in fin.* id non est referendum omnino ad gladium verum, quo occidens extinguatur: Sed ad pœnam, quæ juxta criminis proportionem vel per judicem justè infligenda, vel prudenti Principis arbitrio secundum circumstantias moderanda, aut mitiganda: non semper secundum speciem, sed secundum pœnæ vel gratiæ mensuram; alioqui, si ea verba essent intelligenda juxta speciem, non possent homicidæ justè damnari ad trirèmes, quod tamen assidue fieri solet; Deinde ibidem, ut in illo *Apocalyps. C. 13. v. 10. dicto: qui in gladio occiderit, oportet eum gladio occidi.* Non agitur de officio Principum & Imperantium, sed de prædictione malorum homicidis futurorum, qui, tametsi subinde pœnas humanas effugiunt, justo tamen Dei judicio plerumque cum Absolone gravissime affliguntur.

§. VIII.

Porro dum *urgent*, Jure Naturæ pœnam Capitale[m] homicidis dictari, quia nihil magis naturale sit, quam ut, quod quisque damnum alteri intulerit, jure Talionis ipse rursus patiatur; in Jure Naturæ verò non competere Principi potestatem dispensandi. *Respondet*, negando Antecedens: Nam licet Jus Naturæ in genere dictaret, puniendos esse delinquentes, modum tamen pœnæ in nullo delicto determinat, sed prudenti Principis arbitrio relinquit. Nec potuit jus Naturæ pœnarum species determinare, quia pœna, ut justa sit, debet habere proportionem cum delicto, delicta verò infinities variant, etiam ejusdem speciei; At quæ ra-

lia

lia sint, regulis universalibus, quales sunt dictamina juris Naturæ, includi nequeunt. Sic jus Naturæ dicitur quidem medico, ægrotantibus succurrendum esse medicamentis aptis; sed quænam talia sint, frustra quæret medicus in jure Naturæ cum pertineant ad artem medicam, sic jus Naturæ dicitur, neminem in contractibus esse ludentem, sed res justo pretio vendendas. At justum pretium jus Naturæ non definit, sed determinatio ejus pertinet ad prudentiam æconomicam; Ita pariter determinatio pœnæ ex prudentiæ politicæ regulis petenda est, non ex jure naturæ. Deinde Jus Talionis saltem dicitur, non habere eum, qui paria iis, quæ fecit, patitur, causam conquerendi, quasi ipsi fiat injuria, è contra non dicitur, illum, qui injuriam passus est, debere tantum damnum inferre, quantum alter fecit; neque dicitur, eum, qui jus coercendi habet, aut tantum, aut non majus damnum inferre debere, uti vel ex solo jure coercitionis Paternæ liquidum est. Insuper Naturalis illa de Talione ratio saltem probat, Principem Caputalem pœnam homicidis justè pæfigere, minimè verò probat, Principem eam semper executioni dare debere.

§. IX.

Quod si autem instant dissentientes: Tametsi jus Naturæ non dicat pœnam Caputalem homicidis, tamen id certò, dicitur, ut delicta puniantur, adeoque per Jus Aggratiandi in nostra hypothesis contra jus Naturale & Divinum peccatur, quod, Princeps seu Minister justitiæ Divinæ, nocentem homicidam absolvat. Errant nimium. Hoc enim argumentum obstat etiam ipsis dissentientibus, qui saltem in aliis quibusdam delictis juri Aggratiandi locum concedunt: Cum tamen Naturalis & Divina Lex sine distinctione præcipiat: maleficum non patieris vivere. *Deuteron. 21.* & de Judice ad *Rom. 13.* dicitur: *non sine causa gladium portat, vindex in iram illi, qui malè agit.* Adeoque si Princeps tenetur in omni casu nocentes Punire, jus Aggratiandi nunquam exercere poterit. Verum nota est differentia inter præcepta juris Naturæ Negativa, & Affirmativa: Illa nunquam aliter se habere possunt

possunt; Hæc verò varias admittunt limitationes ex variis circumstantiis; quæ differentiam scholastici ita solent exprimere: Negativa præcepta obligare semper & pro semper; Affirmativa semper quidem, sed non pro semper, id est, multas posse rationes esse, quæ jubeant, vel saltem prudenter suadeant cessationem actionis ad tempus in præcepto affirmativo. Unde potius pro mea sententia sequens subnecto ratiocinium: Præceptum Juris Naturæ de puniendis delinquentibus in genere; non tollit jus aggratiandi in genere. Ergo etiam præceptum juris Naturæ de puniendo homicida: esto etiam, quod tamen nec dum concessi, ali-quod adesse, ei capitalem pœnam irrogans; non tolleret jus aggratiandi homicidam in specie: Licet enim ex virtute justitiæ punire fontes Princeps debeat, potest tamen etiam ex virtute clementiæ quandoque remittere aut mitigare pœnas; siquidem pridem jam abolita est illa quorundam veterum, & Stoicorum opinio, qui ex levi argumento negabant, pœnæ remissionem unquam justè & licitè fieri posse. Quod pluribus pro more suo eleganter & solidè pertractant GROTIUS de Jure B. & P. Lib. 2. C. 20. §. 21. FRANÇOISCHMIDT. Jurispr. publ. Univers. L. 3. C. 2. sect. 3. §. 3. n. 129.

§. X.

Si denique *parent* dissentientes, homicidam non subla-to, Reipublicæ sufficienter cautum non esse; meminerint, oportet, quod, cum Legislator in sua Lege (saltem licitè) dispensare non valeat, si viderit dispensationem in detrimentum Reipublicæ cessuram, omnino credendum sit, in tali hypothesi, ubi homicida superstes in plura ejus generis scelera ruiturus creditur, dispensationem denegatum iri. Imò, cum præter pœnam sanguinis, alia dentur supplicia, homicidam ad similia patranda inhabilem reddentia, v. g. deportatio in Insulam, condemnatio ad triremes; inclusio in perpetuum carcerem: nulla est necessitas, ut pro Reipublicæ salute supplex homicida interficiatur. Quin ipse Creator Divinus primum homicidam simul & fraticidam Cainum non tantum non Capitis damnavit, sed etiam

iam, ne ab alijs, uti non vanè metuendum erat, capite puniretur, speciali signo pramunivit, sicut legere est *Gen. 4. vers. 15.* facile tamen concesserim, Principem in concedenda hac pœnæ capitalis remissione non tam facilem esse debere, præterquam si gravior & urgentior causa adfuerit, cum gladium frustra non porter, sique vindex Divina Nemesis in omnes, qui scelera morte digna patnaverunt. *Rom. 13. vers. 4.* ZIEGLER. *de Jur. Majest. lib. 1. C. 8. §. 3.* Neque enim putandum est, dum jus Aggratiandi in pœna homicidii propugno, nie defendere velle libertatem homicidas quosvis impunes dimittendi, aut etiam suadere, ut contra regulas prudentiæ ex vitioso affectu dispensetur; nam uti in genere jus Aggratiandi debet exerceri non tumultuarie sed ex rationibus & causis prudentibus; ita eadem haud dubiè sub intelligenda sunt, in assertione de licentia gratiam dandi homicidæ. Unde frequentior etiam est in hoc nostro casu ea species aggratiationis, quæ non plane impunem dimittit homicidam dolosum, sed saltem pœnam Capitaalem commutat in minorem; quippe rarò subsunt rationes omnis pœnæ dimissionem suadentes.

§. XI.

Antequam hoc loco obeam, non possum præterire ineptum ac Insulsum illud commentum, quo usus est THOMAS. in *supr. cit. Diss. de jure Aggrat. Princip. Evang. in caus. homicid. dum* variis & iteratis vicibus, præsertim *Cap. 1. §. 5. §. 10. item Cap. 3. §. 6. 7. 8. & 9.* sine ulla probatione adducta, non verum dicendi, sed calumniandi animo, non solum imputat summo Pontifici: quod Principibus Catholicis jus dispensandi in crimine homicidii ademerit; ita ut illud salva sua Religione in terris sibi subjectis exercere nequeant. Vanissimo hocce figmento, aliisque pluribus, poterat equidem rudem, nondumque meliora edoctam juventutem, in auditorio decipere: neutiquam verò magis eruditos in suas seducere partes; quippe reclamante manifesta praxi, qua Principes & Imperatores Catholici hanc in homicidio doloso, certis

tis ex causis Aggratiandi potestatem, utpote merè Regiam & politicam, non tam à summo Pontifice vindicant (& quomodo vindicent, quod Pontifex iisdem in dubium vocare nunquam præsumpsit?) sed jure sibi proprio competere vix non quotidianis rerum argumentis confirmant.

§. XII.

Postquam igitur per hucusque adducta satis constat, Principi gratiosam dispensandi facultatem in iis etiam delictis competere, quorum poenæ Capitales in Legibus Divinis antiqui Testamenti extant, eadem multò magis exerceri poterit circa poenas capitales aequæ, ac non capitales, quas Humanarum Legum placita introduxerunt, utpote in quo Dd. omnes, illi etiam, quos in præcedentibus adversantes habui, consentiunt; Præsertim si sint delicta, quæ non Natura, nec Lege aliqua Divina, sed humana tantum, ob politicam aliquam & probabilem causam sub poena prohibita, aut contra solum Principis jus, & personarum ejus commissa sunt. *L. uu. C. si quis Imper. maledix.* Hinc Theodosius junior ab amicis interrogatus, cur neminem eorum, qui ipsum laxissent, supplicio capitis afficeret, fertur respondisse: *Utinam mihi liceret, & mortuos ad vitam revocare.* Ad privatas quidem injurias oportet Principem esse facilem ad ignoscendum, sed in aliis, quæ ledunt Rempublicam, decet esse severiorem. THEODOR. Colleg. Crim. disp. 10. th. 7. lit. b. Ac si delictum in se & sua natura turpe sit, sed poena capitis civili tantum jure imposita v. g. in furto, & rapinâ; quin Princeps eandem remittere possit, non dubitatur; plerique tamen suadere volunt, propter vigorem disciplinæ publicæ, eam non facile in totum relaxandam, sed potius in aliam leviolem esse mitigandam. Cæterum omnia hæc usque dicta ad hæc magis locum habent, si delicta sint dubia, incerta, necdumque satis probata; nam in his plenior & laxior condonandi facultas Principi tribuitur, & merito eò quod juxta regulam *L. 5. pr. ff. de pan.* satius sit impunitum relinqui facinus nocentis, quam innocentem dampnare. MYLER. de Princip. & Stat. Imp. part. 2. C. 50.

CAPVT

CAPVT IV.

De Forma & Effectu Juris Aggratiandi

§. I.

Recto nunc pede ad Juris Aggratiandi Formam & effectum progredior; Forma autem est, per quam res in suo esse constituitur, ab aliis rebus distinguitur. Videndum itaque in quo formalis ratio Juris Aggratiandi consistat; Consistit verò in ipsa potestate promeritis poenas ex clementia remittendi; ita, ut aggratiatio sit ipsa gratioſa liberatio à Juris & poenarum vinculo; rationabili tamen causa interveniente.

§. II.

Qua propter superior nunquam proclivis sit ad dispensationis Gratiæ impertiendam, nisi rationes ejusdem habeat prudenter commoventes, neque in condonandis suppliciis nimium facilem & frequentem se praebeat, alioquin facile crimina faciliora & frequentiora reddet. Quicquid enim justī & laudis juri aggratiandi inest, id ex justitia & veritate causa moventis dependere, & ideo Principem absque causa ex mera gratia damnato reo poenam citra cauteriatæ conscientiae formidinem remittere non posse, asserit SCHWEDER. in *Jur. publ. part. spec. Sect. 2. C. 14. n. 5.* siquidem cum Reipublicæ interlit, ne delicta maneant impunita, & obligatio delinquentes puniendi, ex ipso Naturali Jure dependeat, ut unius subinde castigatione & exemplo centum alii terreantur; *Recesf. Imper. de A. 1567. §. wie wohl wir. ibid. ein vorgebildeten Spiegel haben.* Hinc promiscue & sine causa gratia non est facienda, ne universioni concedendo, cum hoc alios perdat infinitos; Adeoque sæpe Princeps pro abolitione poenarum sollicitantibus prudenter respondere poterit; quod Harpalo olim Philippus Macedo pro amico suo intercedenti reposuit: *Melius est, ut ipse, qui deliquit, ignominiam ferat, quam ego.* P. IV T A R C H. in *Apophthegm.* Hinc etiam de Ludovico Galliarum Rege fertur: quod, cum Reo

cuidam ad mortem damnato, vitæ gratiam secisset, solita devorione incidens in *Psalmum 105. v. 3. Beati, qui custodiunt iudicium, & faciunt iustitiam in omni tempore.* Divino quasi oraculo, officii admonitus gratiam revocaverit. P. MATTHEV. lib. 6. *Histor. narrat. 5. Accedit, quod delicta post impunitatem commissa, ab ipso Magistratu veniam dante commissa videantur, qui si primo perpetrato delicto, capitali præsertim legitimo iustitiæ mucrone, publicæ securitatis violatorem jugulasset, iteratò non deliquisset; idcirco Henricus Angliæ Rex, cum ad preces quorundam homicidæ ignovisset, & ille iteratò eadem admisisset, ac priores eius amici se denuò deprecatores interponerent, Rex animo perculsus inquebat: Ille unum tantum priorem interfecit, sed istum posteriorem ego interfeci, qui primam eadem debite non punivi; ac ea propter iussit, ut de malefactore primo tempore supplicium sumeretur.* MELAND. in *jocof. n. 213.*

§. III.

Quamquam autem ab aliis multis regulæ instar tradatur, Principem de plenitudine potestatis, cujusvis pœnæ reo gratiam posse indulgere, nudumquæ ejus nuntio pro legitima causa sufficere. MOLLER. *semestr. 3. C. 31.* attamen rectius & modestius, meo quidem iudicio, sentiunt illi, qui rationabilem causam Principem ad exercitium hujusmodi Gratiæ moventem desiderant; LIMNÆ. *Jur. publ. lib. 4. C. 8. n. 287.* ubi prudenter inquit: Ne Principes nostri terminos potestatis suæ excedant, summo Reipubl. detrimento, nec ansam delinquendi indistinctè præbeant subditis, illis spator fuerim, ut in remissione capitalium præsertim pœnarum, magnâ utantur circumspectione, eamquæ nec ad qualibet delicta, nec ad quas libet extendant personas. Eleganter MEV. ad *jus Lubec. L. 4. t. 15. art. 1. n. 12.* inquit: sine causa restituens peccat in Remp. quæ eget severis exemplis ad cohibenda facinora, nec ullâ re citius corrumpitur, quàm pœnarum elusione, quibus solis publicanitur disciplina. Nec non REINKING. prout quidem, ait, debent esse Principes ad elementiam, sed quantum fert bonum publicum. Confer. dicta ad §. IIX. sup. Cap. I.

§. IV.

§. IV.

Sicut autem hæc & similia prudentum dicta de promiscuis & indifferenti condonatione & poenarum remissione exaudiri volunt, ita non est dubium, quin Princeps ad Gratiolam indulgentiam, iustis ex causis laudabiliter procedere possit. Ex quibus verò causis superior ad delictorum veniam prudenter moveri valeat, multi multas confarcinarunt; quarum quædam illæ ipsæ sunt, quæ non soli Principi propriæ, sed ad viam iustitiæ, adeoque ipsos etiam inferiores Magistratus spectant, pro ut *supr. Cap. 1. §. 4. & §. item Cap. 11. §. XIV.* pluribus monui, aliæ autem exigui esse ponderis, & in uno alterove delictorum genere, haud tamen in omnibus valere videntur. Variæ causæ exhibentur in compendio à SCHWEDER. *dict. loc.* veluti multitudo liberorum, spontanea delicti confessio, aliquando temporis diuturnitas, non nunquam gravis ira, amicitia, insigne in Republicam meritum, & eximia virtus, nobilitas & dignitas, officium, paupertas, probitas vitæ antè actæ, summa senectus, intercessio potentis Patroni, insigne artificium, utilitas publica. At, quid de his aliisque pluribus sentiendum, ad rectæ rationis trutinam excutere, instituti ratio non paritur. Summa igitur, hic Principis prudentia, maximaque cura opus erit, ut fictas nonnullorum Aggratiandi causas à iustis & legitimis segreget, & sic cognitâ prius delicti gravitate, probè considerata causarum quantitate, ac personarum qualitate, illud demum eligat atque concludat, quod neque Reip. damnum, propriæ conscientiæ maculam, ac privatis injuriam inferat, aut, quod maxime verendum, ne iustitia Divina ob humanæ iustitiæ neglectum, ad justam iram, totiusque terræ everfionem provocetur, juxta illud HESIOD.

sape viri peccata luunt tota unius urbes.

id quod pie Imper. JUSTINIAN. quoque considerasse, ex Nov. 77. satis liquet. Absit igitur, ut perversorum quorundam Causidicorum vox subscribatur, qui, quando spes dolosi refulget nummi, omnem movent lapidem, ut aliquid pallioli ad obsuscandam aut imminuendam facinoris veritatem

tatem effingant, & confarcinatis variis glaucomatibus sceleratis hominibus veniam reportent; exeat porius tunc injusta misericordia, quæ parcendo lupis, niactat oves, & indulgendo reis, multos ad prolapsionis provocat interitum; sapius est contra mente volvatur illud SENEÆ, non posse pinguiorem victimam niactari Deo, quam hominem sceleratum.

§. V.

Ad formam Juris Aggratiandi etiam pertinet modus, quo hoc jus exerceri solet; quod nempe vel litteris fiat, quas Gratiæ Rescripta vocamus, vel sine litteris, aut motu proprio, aut ad delinquentium, eorumve amicorum intercessionem & petitionem; quid autem in his singulis veniat observandum, cum ob pagellarum angustiam examinare nequeam, illud unicum saltem moneo quod gratiam impetratam perimat seu invalider subreptio ab falsitate precum, aut suppressio quarundam qualitarum; unde rectè concludit COVARRUV. var. resolv. lib. 1. Cap. ult. n. 8. remissionem homicidii, ejusque abolitionem à Principe impetratam, non factâ mentione prioris indulgentiæ, simile crimen eidem impetranti dimittentis, tahquam subreptitiam esse invalidam; eo quod Princeps, si certior factus fuisset, eum homicidam, veniam criminis postulantem, prius aliud homicidium perpetrasse, ejusque veniam obtinuisse, veniam modo petitam probabiliter non concessisset. plura habet THEOD. Apb. 7. n. 8. § 28.

§. VI.

Effectus denique Aggratiationis, qui paucissimis nunc attingendus venit, est, ut Reus à pœna promerita liberetur. Interim ejusmodi gratia generaliter tantum concessa, cum sit contra juris communis vigorem, stricte est intelligenda, ideoque regulariter nec restitutionem bonorum confiscatorum, juriumque pristinorum operatur, nec infamiam criminis tollit. L. 3. C. de gener. abolit. L. 2. L. 6. L. 7. C. de sent. pass. nisi Princeps hoc expresse & enixe velit, reum plenariè in Integrum restituendo; L. 1. L. 3. C. d. r. L. 10. C. de gen. abolit. Ubi bona apud fiscum existentia, quidem recipit. Ast neque

que fructus medii temporis à fisco repetere neque bona interim interim bonâ fide translata vindicare potest; de quibus omnibus, aliisque ad effectum Aggratationis spectantibus plura tractant MOLIN. de J. & J. Disp. 10. § 48. MYLER. de princip. & stat. Imper. p. 2. C. 53. GLETTIE in Tr. de Crimin. tom. 1. p. 1. §. 8. n. 27. seqq. WISSENB. Disp. ad ff. 37. th. 29. LAVTEB. Colleg. Pract. tit. de pen. item de sent. pass. in fin. Multa ad huc alia quidem dicenda superessent, sed cum Dissertationis Consuetæ modum excederent, hic filium abrumperere cogor.

F I N I S.

Positiones ex jure publico Universali.

1. Populus contra Principem Majestatem proscribere potest & vice versa. 2. Duæ potestates supremæ in eadem Republica Monarchica non in uno, sed in diverso genere esse possunt. 3. Sola infidelitas non sufficit ad bellum indicendum. 4. Princeps necessitate exigente subditorum bona hosti cedere potest. 5. Repressalias adhibere inter gentes licet. 6. Potestati supremæ seculari non convenit jus sacrorum.

Positiones ex jure publico Romano-Germanico.

1. Recessus Imperii ex parte Imperatoris ut conventio, respectu statuum verò obligant ut Lex. 2. Germania & Italia in unam transferre Rempublicam. 3. Ad Auream Bullam in substantialibus abrogandam vel extendendam non solus Electorum, sed reliquorum statuum consensus quoque requiritur. 4. Quandoque Imperator ratione Imperii absque consensu statuum pacem inire potest. 5. Imperator abiturus potest sibi quem velit vicarium constituere non adhibito consensu vicariorum Imperii. 6. Si Imperium per annum vacet, vicarii investituram feudi petentibus dare possunt.

Posi-

Positiones ex jure Canonico.

1. Scientia Juris alieni non inducit malam fidem impedientem praescriptionis de jure Can. 2. Translatio Episcoporum jure Ecclesiastico prohibita est. 3. Suscipiens beneficium cum animo non perseverandi in statu clericali, non tenetur ad fructuum restitutionem. 4. Decimas ab antecessore non solutas successor solvere tenetur. 5. Consuetudo testandi de bonis merè Ecclesiasticis valida est. 6. Votum ingrediendi Religionem ab Episcopo emissum obligat.

Positiones ex Jure Civili.

1. Minor in negotio valido laesus ab adepta Majorumitate eligit, an intra quadriennium restitutione in integrum, vel intra 30. Annos, contra tutorem actione tutela agere velit. 2. Virgicus de bonis Privigni Usufructum petere nequit, licet ei alimenta praestet. 3. Divisio hereditatis ob modicam inaequalitatem rescindi potest. 4. Haeres Praesens vires hereditatis juramento manifestationis indicare tenetur, si absens petat. 5. Esi pro instrumento militet praesumptio, nil tamen impedit, quo minus contrarium ostendendo infringi possit. 6. Ubi inter Conjuges Communio bonorum recepta, defuncti solummodo bona inter liberos & conjugem supersitem dividuntur.

Positiones ex Jure Feudali.

1. Investitura feudi nondum aperti sub conditione facta valida est. 2. Pater feudum, cui in gratiam filii renunciavit, repetere potest, si hic sine descendantibus moriatur. 3. Filius qui commisit contra patrem talem ingratitude, qua sufficit ad exheredationem, idcirco à Patre etiam cum consensu Domini feudo privari non potest. 4. In feudo franco Femina regulariter non succedit. 5. Vassallus in testamento filio suo ad feudalia tutorem dare potest. 6. Ut res Ecclesiastica tanquam feudalis praescribatur, sufficiunt 30. Anni.